



27. September 2017

UKA 2017/104

**Uunga siunnersuut: Piginneqatigiilluni inissiat pillugit Inatsisartut inatsisaat nr. xx, xx. xxx 2017-imeersoq**

(Kommuninut, Nunaqarfinnut, Isorliunerusunut, Attaveqaaqatigiinnermut Ineqarnermullu Naalakkersuisoq)

Piginneqatigiilluni inissiat pillugit Inatsisartut inatsisaannut Naalakkersuisut siunnersuutaannut Siumumiit imaattumik oqaaseqassaagut.

Siumumiit anguniartuagarput tassaavoq kikkut tamarmik peqqinnartumik inissaqarnissaat, qanoq akissarsiaqartigineq apeqqutaatinnagu. Taamatuttaarlu Siumumiit kissaatigisarput tassaajuarpoq piginneqatigiilluni illulioriaatsit piorsartuarneqarnissaat ineriartortittuarnissaallu kikkut tamarmik tulluarisaminnik inissialiorsinnaaniassammata.

Siumumiillu oqaatiginngittoorusunngilarput assorujussuaq iluarisimaaratsigu Naalakkersuisooqatigiinnissamik isumaqatigiissut aallaaviulluni naligiinnerusumik, toqqissisimanartumik ineriartortitsiviusumillu inuuneqarnissamik siunnerfeqarluni timitalersuinissaq orninneqaleramat.

Ullumikkut inoqarfinni minnerusuni nunaqarfinniluunniit piginneqatigiilluni inissialiorsinnaaneq ajornartorujussuuvoq. Ilaatigut piginneqatigiilluni inissiaateqalissagaanni piginneqatigiit ikinnerpaaffeqarput inoqarfinni minnerni naammassiuminaattorujussuusinnaasumik. Minnerunngittumillu aningaaseriviit tunuarsimaartarnerat eqqarsaatigissagaanni.

Ineqarnermik aaqqissusseqqinnissaq Naalakkersuisuniit ataasiarani oqaatigineqartartoq inuunermi atugassarititaasunut qularnanngitsumik pitsaanerulersitsisussa q Siumumiit ataasiarata ujjartortarparput. Taamaamat manna iluatsillugu aaqqissusseqqinnissap oqaatigineqareersup qaqugu pinissaa apeqqutigerusupparput. Una aaqqissusseqqinnermut ilaatinneqartutut oqaatigineqaraluartoq ataatsimut tamakkiisumik isiginnilluni aaqqissuussinissaa piaartumik ingerlanneqarnissaa Siumumiit kaammattuutigerusupparput.

Siumumiit taamatut oqaaseqarluta ataatsimiititaliamut susassaartumut sukumiisumik suliarineqarnissaa siunertaralugu aappaasaanneernejartussanngorlugu ingerlateqqipparput.

Jess Svane

Siumut